



TAIM BILONG SPOT

Tupela poto long dispela pes i soim ol sampela memba bilong tim bilong Papua Niugini i bin stap insait long bikpela resis na pilai spot long Australia, stat long 16 Mas i go inap 19.

Papua Niugini i bin salim 10 memba i go: 7-pela man na 3-pela meri. I bin i gat 412 man na 189 spotmanmeri bilong olgeta provins bilong Australia i bin kam resis long dispela taim long bikpela ples pilai long Brisbane, ol i redim nau long Komonwelt Gems long 1982.

Poto antap i soim wanpela ofisa bilong ol pilai long Brisbane, em Mista Jeff McKinnon, i sekan wantaim Tau John bilong Port Moresby. Man i sanap namel em Mista Tom Brandt bilong Lae, em i bosman bilong PNG tim. Man long raithan em George Vavine bilong Port Moresby.

Poto daunbilong i soim ol sampela memba bilong PNG tim.

Tupela poto wantaim i bilong Australian Information Service na Bob Peisley i bin kisim.



LUKIM INSAIT

Lukaut, PNG	3
Baim Bek Bodi	3
Pas i kam	4
Not Solomons Tok	5
Yunaitet Nesens	6
PNG Rais win	7
Guria toktok	8
Rasia, Saina	10
Stori Tumbuna	11
Ol Baibel Piksa	13

**National weekly in
Melanesian Pidgin.**

**Editorial Offices:
P.O. Box 1982
Boroko**

**Phone: 25.2214
25.2552
Telex: NE 22213**


**Branch Offices:
Wewak
Phone: 86.2479**

**Wabag
P.O. Box 111**

**Advertising:
In P.N.G.
Ms. Penny Donald
Phone: 25.2214**

**In Australia:
Kevin Engel
8 Duraba Pl.
Caringbah (2229)
Phone: 525.6263**

**Subscription Rate:
Annual: K8.00**



Poto long lephan i soim Mista Komini Kanawi, em i namba wan lokal ensinia bilong PNG i bin kisim laisens bilong fiksिम ol DC 3 balus.

Em i wok long Air Niugini, i gat 24 kris-mas, i singel yet, i bilong Langendrowa viles long Manus. Em i bin skul pastaim long Manus na long 1972 em i joinim TAA na i bin skul long Lae Teknikal Koles na i wok-olsem aprentis inap 5-pela yia long olkain wok ensinia long fiksिम balus.

Poto daunbilo i soim wanpela lain man-meri i redi long resis long Brisbane. Kirap long lephan yu ken lukim: Greg Considine bilong Viktoria, Tony Aiam bilong Lae, Robyn Strong bilong Viktoria, Michael Sengi bilong Madang, Cheryl Boswell bilong Saut Australia, Andrew Burrau bilong Lae.

Poto i kam long Australian Information Service na Bob Peisley i kisim.





MIPELA I AMAMAS NA MIPELA I WARI.

Melanesian Kaunsil Bilong Ol Sios, long tok save em i bin givim long gavman long nem bilong olgeta het sios na misin bilong Papua Niugini, i bin autim sampela gutpela tingting. Nogut gavman i haitim long opis bilong em tasol, olsem na mipela i laik autim hia, bai olgeta manmeri i ken save long tingting bilong ol sios.

Bihain long gavman, ol sios o misin i winim olgeta arapela grup long PNG long sais bilong em. Sios i poroman tru bilong gavman, na i olsem bikbrata bilong em. Long wanem gavman i no stap yet na sios i stap pinis long planti hap bilong PNG.

Olsem Bikbrata, Melanesian Kaunsil Bilong Ol Sios, i autim sampela tingting moa long gavman.

Mipela Sios i amamas long ol dispela samting:

Mipela ol sios i amamas na tenkyu long gavman i bin ranim kantri bipo long nupela ileksen. Em i bin pasim wantaim olgeta hap bilong kantri. Na tu aninit long em wok bisnis bilong kantri i bin go het gut na i bin givim gutpela nem long PNG long ai bilong ol bikpela kantri.

Mipela Sios i wari long ol dispela samting:

a.) Mipela i pilim ol lida bilong yumi i bin lusim strong na pawa bilong ol - em ol lida long gavman na long ples tu. Mipela i pilim dispela nupela pasin bilong dring na spak i bin bagarapim pasin bilong harim tok bilong ol bikpela man - olsem yumi bin mekim bipo.

b.) I gat tumas tingting long olkain resis tasol i kam insait long kantri. Yumi resis long olkain spot. Yumi resis long save long skol. Yumi resis long winim mani. Yumi resis long kisim kain kain naispela samting bilong ol waitman. Yumi resis tumas long go het tasol, long developim kantri hariap hariap tru. Mipela i wari long dispela nupela pasin.

c.) Mipela i pilim planti lokal pipel tumas i gat dispela kain tingting: "Maski, i orait - larim ol bikpela man i wari na bosim mipela. Ol i gat planti mani na save pinis. I orait long mipela."

d.) Planti fama tumas i laik groim tasol ol samting i save winim mani hariap. Ol i no ting long groim kaikai long pulimapim bel bilong ol. Ol i ting long baim kaikai long stua na long mani stret. Em i isi moa.

e.) Planti bikpela lida bilong yumi i save mekim bikpela wok bisnis wantaim ol bikpela kampani - na ol kampani i wok long grisim ol long mani

f.) Pasin bilong edvetais o tok gris long salim samting long redio, em mipela i no laikim. Mipela i no laikim bikos mipela i pilim dispela kain tok edvetais i mekim yumi aigris moa na moa long ol samting bilong ol ausait kantri. Na olkain tingting na pasin bilong ol ausait kantri i kam insait long PNG na i wok long bosim tingting na laip bilong yumi. Olsem tasol na sindaun bilong mipela i hangamap long olkain bisnis na aidi bilong ol ausait kantri na ausait bisnisan. We stap dispela tok long sanap stret long tupela lek bilong mipela yet?

LUKAUT, PNG, BAI YU PUNDAUN

Wanpela grup saveman bilong Wol Beng (World Bank) i bin autim tingting bilong em long rot Papua Niugini i bihainim nau, na em i pret bai taim nogut i painim yumi, sapos yumi no senisim sampela pasin bilong sindaun bilong yumi.

Wol Beng em i bikpela asosiesen tru long givimaut dinau long olgeta kain kantri. Tasol bipo em i givimaut, em i save glasim gut tru tru pasin bilong ol pipel na bisnis na wok bilong wan wan kantri. I tru, long yia i go pinis, dispela Wol Beng i bin tok orait long PNG i ken kisim sampela dinau. Em i bikos long dispela taim ol samting i ran gut.

Tasol dispela grup i bin raun tupela taim long 1976 na glasim gut tru olkain bisnis na wok na pasin bilong ol pipel na gavman - na ol i tokaut kliia long ol PNG na gavman bilong em olsem: Gavman na pipel i lusim tumas mani long olkain samting tude, na i no save winim inap mani long kain wok insait long kantri. PNG i win tru long olgeta nupela kantri i kisim dinau na presen inap long 80 dola long wan wan PNG man meri pikinini.

Ol dispela saveman i tok: PNG tude i hangamap tumas long Australia long kisim klostu wan hap bilong olgeta baset mani bilong em. Planti pasin bilong kaikai na bisnis na leba yunion na gavman na pablik sevis na baim olkain samting - i bihainim tasol pasin bilong Australia. Na PNG i narakain kantri; i no Australia; i no olsem Australia. Olsem em i mas senis.

Olsem, Wol Beng ripot i tok: PNG i mas go slo lik-

lik long baim planti kain samting. Long wok bilong em yet, em i mas winim moa mani. Planti tumas mani i lus long peim ol wokman, planti haus bilong gavman i bikpela tumas, pasin bilong telipon hia i smatpela tumas. Na moa kain samting i no pas gut long dispela nupela kantri.

Ol saveman bilong Wol Beng i tok olsem: Tupela samting i ken helpim tru PNG. Em nupela kopa kampani ol i laik statim long OK Tedi na bikpela wok timba long Vanimo. Tasol tupela i mas wok gut tru long yia 1985. Sapos nogat, bai trabel i kamap long mani na wok bisnis

bilong dispela kantri. Tasol inap nau - tupela kampani ya i no bin stat yet.

Ol Wol Beng ripota i tok tu: Pasin bilong baim olkain smatpela naispela samting bilong ausait kantri i mas slo daun long PNG. Tasol ol i ting ol pipel i no laikim dispela kain tingting, na bai ol i no mekim.

Na narapela samting: ol takis i mas go antap moa moa yet bilong winim mani bilong ranim gavman. Na ol pipel i no laikim dispela samting tru.

Olsem - ol saveman bilong Wol Beng i wetim trabel i kamap long PNG long 1985 samting.

TOK TENKYU LONG PLIS

Praim Minista na Minista bilong Plis, Mista Michael Somare, i bin tok amamas na tenkyu long smatpela pasin ol plisman i bin yusim long Port Moresby long 3-pela de bilong Ista. Em i namba wan taim inap long planti yia, i no gat wanpela man i dai long wanpela holide wiken olsem long Moresby.

Ol plis i bin pasim planti ka long nait na long san, na i bin raun long planti ples bilong taun. Dispela pasin i bin stapim planti raskol na i mekim ol pipel i sindaun isi.

BAIM BEK BODI

Bisop John Cahill, S.V.D., bisop bilong Katolik Sios long Isten Hailans na Simbu, i bin tokaut kliia long Ista olsem: Dispela pasin bilong mekim ol draiva i mas baim bek bodi bilong wanpela man o meri i bin dai long haiwe long asua bilong em yet, na i no gat liklik rong long draiva. . . . putim dispela kain hevi long draiva em i no stret.

Planti taim ol i putim hevi long lain na famili bilong draiva i no gat rong liklik na ol i mas baim bek bodi bilong daiman. Sampela taim man i spak na i pundaun long rot na ka i goapim em - na i no asua bilong draiva. Em i asua bilong spakman yet. Tasol, nogat, ol wanlain bilong spakman i singaut long pe. Em i no stret. Dispela kain pasin em i no Kristen pasin tu. Dispela pasin i senisim bodi bilong man long bek mani tasol.

Bisop Cahill i tok, em i bin stap inap 33 yia long Papua Niugini na bipo i no gat dispela pasin. Nogut ol man i tok em i pasin bilong ol tumbuna. Em i giaman tok. Dispela em i wanpela nupela we tasol bilong stilim mani. Na bisop i tok strong long olgeta Katolik long Isten Hailans na Simbu, long ol i no ken bihainim dispela pasin bilong baim bek bodi taim daiman i bin dai long asua bilong em yet. Dispela kain pasin i no stret, na i brukim olgeta gutpela Kristen tingting na as lo.



TOK I GO I KAM

Dia Edita - Hia mi laik askim yupela i go long olgeta man na meri i save rait na toktok i go long Wantok niuspepa bilong yumi long meri i putim longpela na sotpela trausis bilong man, na bikpela ai glas, na penim maus na pinga.

Planti taim mi bin ritim long Wantok nius. Man i lukim pasin bilong meri i no stret. Kwiktaim em i rait i go long Wantok nius. Meri i ritim Wantok long dispela kain tok bilas bilong man. Em i gat wari, orait em i raitim wari bilong em i go long Wantok. Man i lukim na bel i kaskas tru.

Olsem na yupela pulim toktok i go i kam long Wantok nius. Em i no gutpela tumas long yupela. Man i wari na meri i wari. Yutupela i go inap we? Laik tokim yupela. Yupela ol manmeri i wok long taun i wari tumas ol pasin bilong meri. Em i wari na kra i bilong yupela long taun na siti.

Dispela kain wari i no inap bringim wanpela gutpela pasin i kam long ol pipel long ples. Yu ol taun manmeri i wari tumas na sutim, tok i go i kam long nius. Wari bilong yupela. Mi bisman, mi save amamas tasol.

Joseph Henry,
Kimbe/W.N.B.

PAIT LAIK KAMAP

Dia Edita - Yes olgeta rita bilong Wantok, na ol man husat i makim Gavman bilong Papua Niugini, na ol husat i wok long ol gavman dipatmen wantaim ol kampani nabaut. Nau mipela i laik autim sampela samting na yupela ken lukim. Mipela i laik yupela mas ritim dispela pas long Wantok na tingim gut na bekim sampela tingting long Wantok nius.

Wanpela samting i olsem: "Bilong wanem na ol memba bilong mipela long

haus ov palamen i save kisim bikpela mani tumas? Ating wan tausen tu o faiv tausen samting? Plis inap long yupela putim namba bilong hamas mani ol wan wan memba i save kisim insait long Wantok nius o nogat?

Wanpela samting tu planti taim ol man husat i wok long dipatmen o wokes yunion o kampani, oltaim i kra i long kisim moa pe. Na mipela i laik save bilong wanem laikim moa pe? Yu laik spak long bia?

Yupela opim ai na lukim ol man bilong ples. Manmeri long ples i save traim hat tru long painim K1 o K5 samting. Wokabaut longwe tru karim draipela bilum i go long maket. Ren i wasim ol, san i hat tumas, tarangu ol i wokabaut. Sampela i peim p.m.v. trak yet long i go long maket. Na sampela i wokabaut.

Na tu peim dua bilong go insait long putim maket. Bilong wanem tarangu ol i laik painim K1 o K5 samting. Long dispela, yupela i mas mekim sampela samting. Apim prais liklik bilong ol samting ol i save salim long maket.

Na maski long kra i long kisim moa pe yupela ol wokman. Na bihain yupela baim bia na spak oltaim na kamap bikbel. Na ol man bilong ples maski. Ol i ken kamap bun nating. Maski ol i ken wokabaut lukluk yu dring. Yu spak na mekim nabaut long ol.

Mipela i ting em i no stret. Em i trabel tru. Nogut bambai pait o trabel i kamap namel long ol rabisman na ol maniman? Mipela i ting dispela pasin bambai i bringim raskel insait long kantri. Dispela samting hia i lukluk kranki tru.

Ritim dispela pas hia na yupela ol rita i ken tingim gut. Yu ting hamas pipel long ples i no gat mani na hatwok long painim sampela toea long maket? Na hamas yangpela i lusim

skul na i no gat wok, i no gat mani na raun nating? Na yupela sampela i kra i long kisim moa pe na spak planti long ai bilong ol.

Yupela wet wanpela de bambai wanpela bikbel i slip wantaim spia. Mipela i pilim bambai trabel i laik kamap long dispela samting. Gavman bilong PNG, ol bikman, yupela mas hariap long lukluk long dispela trabel bambai laik kamap na traim mekim samting. Wokman maski kra i long moa pe.

Maski spak planti long ai bilong rabisman. Yusim gut ol mani bilong yu long mekim gutpela wok. Kisim pasin bilong Jisas long marimari na sori long arapela. Maski long yu ting long yu tasol.

So em tasol na sapos sampela moa i lukim dispela tok i tru plis, plis, helpim na putim moa tok long Wantok nius. Sapos yu ting em i giaman orait, yu wet bai yu lukim. Tenkyu.

Ipri Sawenbarik,
Kando Wankwie,
Na bikpela lain yet,
Is Sepik.

Salim ol pas
i kam long:
**WANTOK
BOX 1982
BOROKO**

GIAMAN PIKSA

Dia Edita - Mi laikim yupela i mas prinin dispela nius. Mi lukim wanpela rong ol man i save soim piksa. Ol i mekim olsem. Taim ol i laik soim piksa ol i putim wanpela gutpela piksa tru ausait na mipela i ting em i gutpela piksa na mipela givim mani nating long ol na kisim tiket na mipela i go insait long lukim piksa.

Tasol ol i no soim gutpela piksa insait, wankain olsem long ausait. Olsem na mipela i belhevi na kros long man. Na olsem bipo ol i mekim long en em inap. Nau ol i putim piksa

ausait long en ol i mas soim insait. Sapos nogat, haus piksa i mas klos.

Sapos yu husat i harim dispela em i gutpela orait, salim sampela pas i go long Wantok niuspepa bai mi lukim.

Noki Wila,
Mt. Hagen.

LUKAUTIM MERI

Dia Edita - Yes mi save lukim ol samting stret long ai bilong mi. Mi save lukim ol plis na C.I.B. Ol i save wok na raun long ka na ol i save lukim ol meri na save tanim ol ka klostu klostu. Dispela pasin i no stret long tingting bilong mi olsem na mi laikim edita mas prinin dispela pas bilong mi long Wantok Niuspepa.

Gabriel Agregum,
Lae.

KIMBE MERI AUTIM WARI

Dia Edita - Hia mi laik askim bilong mi i go long ol gavman na ol kabinet o kaunsil o ol gutpela lida long ples hia long kantri.

Planti taim yumi ritim niuspepa. Ol meri i no gat wok. Ol i save raun long taun na salim skin bilong ol na kisim mani. Sampela ol wokman long helt i wari long skin o bodi bilong yumi i no ken bagarap long ol dispela kain pamuk na kisim sik.

Planti manmeri i save pilai laki o pilai kat. Na ol i no save sindaun long ples na holim graun na wokim bisnis. Ol i save raun long painim mani long fotnait bilong gavman na kampani. Ol i save painim pilai laki long winim mani bilong ol arapela man i gat wok.

Watpo ol gavman minista i no lukluk long dispela na wokim ol strongpela lo long pamuk meri na pilai kat o laki.

Ol minista na ol memba bilong ol provins na kaun-

sil na ol gutpela lida bilong mipela long dispela kantri. Mi gat wari tru long dispela kain pasin i save stap oltaim long dispela kantri.

Husat i laik bekim o yu gat wari rait tasol i go long Wantok Niuspepa. Mi wet tasol long kisim na ritim.

Pauline Gende,
Kimbe/W.N.B.

P.M.V.

Dia Edita - Mi laik tok olsem, ating moa gut sapos yu i go long provins bilong yu yet na baim ka na mekim p.m.v. Em i bikos yu mas tingim husat famili bilong yu, husat bai helpim ol sapos yu i stap longwe.

Yu mas tingting gut bikos long sampela taim i no stret tumas long ran i go long painim man o maket na ol maket o man i no kisim ka bilong yu na yu sem. Em bikos em i gat ka bilong em yet em wet long en. Na tu tingting bilong mi, yu lusim hap bilong yu kam i no bilong yu baim ka na mekim p.m.v. Yu kam long wok mani tasol long dipatmen.

Nau olgeta hap bilong Madang inapim p.m.v. na nogut yu westim taim long baim ka. Nogut yu ting i no gat mani long hap bilong yu.

Mi i no gat tok long ol man i wok insait long taun olsem kuskus, man long beng, bikos ol wok, na tu sapos yu laik baim ka olsem praiwet em i orait.

Wanpela tingting bilong mi long Timoti tu, bikos em wanpela bisnisman na em pasim ples bilong husat laik mekim p.m.v. Ating i gutpela pasin em i no ker ranim p.m.v. moa, em mas i gat hai ka na wok bilong woksap.

Mi no inap rait nating bilong wanem wanpela brata bilong i stap long Vanimo, em i bin tek ova long Madang kontrak brens em Mista Saul Dogoliv. Bikos em i gat p.m.v. long Vanimo tasol, ol i bin stopim p.m.v.

Bill Begga,
Madang.

BOUGAINVILLE DAIOSIS SENET MITING

Inap long 4-pela de long bigin bilong mun Mas i gat wampela daiosis senet miting long Mabiri. Long dispela miting i gat 32 ofisel memba na 13 obseva (ol man i kam lukluk na harim tasol, tasol ol i no gat vot.) Ol deliget i makim 25 peris, o bikpela misin stesin bilong bipo.

Namba wan samting, senet i bin stretim Konstitusen o as lo bilong em. Long aidia bilong em, senet yet i ranim daiosis. Sampela bikpela wari bilong senet em long: planti Katolik pipel i no moa lotu gut, sampela Katolik Skul i no tisim rilesen, pasin bilong dring na spak i kamap bikpela tumas, na long provinsal developmen ol man bilong gavman i no mas ting tasol long winim mani. Developmen i

no ken paulim gutpela pasin bilong man na Kristen sindaun bilong em.

Daiosis Senet i wari long tupela haikul: Rigu Haikul na Tarlena Vokesenel Skul. Ol i bin makim wampela hap graun long Mabiri bilong planim kakao plantesin bilong winim mani bilong ranim dispela skul.

Nau mipela i prinim ol sampela tok i stap insait long tripela pas dispela daiosis senet i bin salim i go long ol bikpela man na ofisa bilong provinsal gavman na komyuniti gavman na viles gavman na ol peris kaunsil long Not Solomons.

Namba wan pas em i long pasin bilong dring.

PASIN BILONG DRING

Daiosis Senet i wari tumas long pasin bilong dring.



Bisop Singkai

Mipela i pilim sapos dispela pasin i no pinis bai i bagarapim yumi olgeta.

Hamas pipel i dai pinis long rot bikos draiva i spak. Long planti ples sampela marit i bagarap. pinis na sampela i wok long bagarap bikos man i spak ol-taim. Pait na pasin nogut i wok long bagarapim planti

samting bilong planti wan wan manmeri wantaim samting bilong komyuniti yet olsem skul, haus kibung, haus lotu, et pos.

Husat long dispela taim i ken sindaun gut na amamas taim singsing, pati, babeku samting i stap. Klostu olgeta, spak i wok long bagarapim.

Na tu long sampela ples ol meri i wok long kamap spak.

Long taun: planti mama i wok long pret taim man i spak na i no kam long haus long nait; planti mama wantaim pikinini i sot tru long kaikai na gutpela klos bikos man i pinisim ol mani long dring. Planti pipel i pret long wokabaut long nait long taun, nogut spakman i paitim ol o tok nogutim ol.

Mipela Daiosis Senet tasol i pilim mipela yet i

no inap long pinisim dispela hevi. Sapos Provinsal Gavman, Komyuniti na Viles Gavman na ol nara-pela mipela i kolim pinis antap i wok wantaim bai i mas i gat we bilong pinisim.

Em hia sampela we mipela i ting long daunim dispela pasin spak.

1. Mipela i no amamas long we man i laik salim bia i ken kisim laisens. Sampela stua i klostu klostu tumas long wan wan. Watpo i gat 6-pela ples long Toniva i salim bia?

Lika Laisensing Komisnin i mas glasim gut husat i laik kisim laisens.


WARI BILONG OL YANGPELA MERI.

Daiosis Senet i gat wari long sindaun bilong ol (i go long pes 10)

AVELING-BARFORD PACIFIC for your compaction requirements.

Vibratory Plates
Vibratory Rammers
Pedestrian Vibratory Rollers
(Double drum hydrostatic drive)

Agents for bearings and hose fittings Ryco-flex Nachi



AVELING-BARFORD PACIFIC PTY. LTD

Head office: Ume Street, Gordons, Port Moresby. Port Moresby.
PO Box 6457. Phone 257166 Telex NE22206

Lae depot: Morobe Avenue, PO Box 1191, Lae Phone 424188 Telex NE42411



FOCUS

NUPELA WOKMAN GRUP

Mista Hikmat Nablusi, man bilong bosim lain wokman bilong Yunaitet Nesens i save go nabaut long olkain nupela kantri na helpim ol long statim kain kain wok na bisnis, i bin lukluk raun long PNG na i laik putim moa saveman insait long wok bilong wokim ol smolpela kain masin bilong mekim wok long ples, em ol i kolim long tok Inglis "Appropriate technology".

Insait long Papua Niugini i gat kain kain grup yangpela savemanmeri i bilong VSO na AVO na OED na AGEH i save wok wantaim gavman na ol misin long kirapim gutpela wok go het long kantri. Ol yangpela pipel ya i kam long Australia, Nu Silan, Amerika, Jemani, Austria, Englan, na Kanada. Nau Yunaitet Nesens i laik salim sampela moa bilong grup bilong em. Dispela grup UNV i min: "United Nations Volunteers".

Ol i wok pinis hia long PNG long mekim go het wok bilong ol pukpuk fam, bringim paip wara i kamap long ples, na statim smolpela bisnis. Ol UNV i gat 750-memba nau na i wok insait long 60 kain kain kantri. Ol memba long dispela Yunaitet Nesens grup ol i narakain liklik: ol i no save kam long ol bikpela kantri tasol. Nogat. Planti i kam yet long sampela nupela kantri.

KOMYUNITI DEVELOPMEN OFISA

Misis Kerstin Kjellman bilong kantri Sweden i bin kam long PNG long helpim dipatmen bilong Yunaitet Nesens i wari long kaikai na wok didiman na fam samting (em (FAO). Misis Kjellman i kam bilong wokim program bilong skulim ol komyuniti developmen ofisa long ol wan wan provins. Ol dispela ofisa bai skul gut long helpim sindaun bilong ol famili long ples. Misis Kjellman bai raun long sampela provins na givim dispela kos.

BIKPELA MANI-BILONG WOKIM HAILANS HAIWE

Esian Developmen Beng i bin tok orait long dinau long PNG inap long K11 milion bilong koltaim 112 kilomita bilong Hailans Haiwe insait long Markham Valley long Morobe Provins. Dispela em i hap namel long Kassam Pass na Erap Riva.



FOCUS

Ol i bin ting dispela em i gutpela wok tru bilong putim dinau mani insait long en, long wanem dispela Hailans Haiwe em i bikrot tru bilong helpim Hailans wok kopi.

Gavman i bin painim olsem samting olsem 30,000 tan kopi i bin kam long Lae long dispela rot tasol. Dispela i helpim moa olsem 175,000 smolpela fama long Hailans. Na olgeta kaikai i save kam long Hailans i save kam long dispela rot tasol. Olgeta de samting olsem 370 trak i save ran long dispela haiwe.

NUPELA MUVI SOIM PNG.

Tripela man bilong Japan i bin raun long PNG inap long 3-pela wik long wokim wanpela Yunaitet Nesens film i soim developmen o go het bilong PNG. Nem bilong film i "Start For Modern Nation". Long tok Pisin em i min: "Wanpela Nupela Kantri i Stat Gut". Yunaitet Nesens i wokim 5-pela film olsem. Ol arapela i soim kantri Haiti, Bolivia, Saire, na India.

YUNAITET NESENS TRENIM 5-PELA HELT OFISA

Dokta Y.H. Paik, man i makim WHO (World Health Organisation) - em han bilong Yunaitet Nesens i wari long helt i bin tok orait long 5-pela PNG pipel i ken go kisim spesel skul long kain kain wok helt.

Mista Arua Igua, het ofisa bilong dipatmen bilong bungim olkain blut na mekim olkain tes long en bilong glasim sik, em bai kisim 3 mun trening long Bangkok long kantri Thailand long Esia.

Sista Bernadette Elenisi - em i het ofisa bilong dipatmen bilong givim sut BCG bilong sik TB - bai kisim trening long Filipin Ailan.

Mista Barnabas Kauvet, sinia nes bilong TB na sik lepra dipatmen, em tu i kisim 3 mun trening long Filipin Ailan.

Mista Christophher Appa - em man bilong wok long glasim olkain sik long Maun Hagen Haus Sik - em bai stadi long Bangkok tu long lainim moa long olkain nupela we bilong glasim sik.

Mista John Tawai, ofisa bilong bosik sik VD long Hailans, bai raun long Singapore, Filipin Ailan na Hong-Kong.



Mis Gabby Gedisa, heimeri bilong Nesenel Komiti bilong ol Luteran Wokmeri long Papua Niugini, i bin salim dispela ripot i kam:

Wok bilong dispela Nesenel Komiti em i bilong bungim tingting bilong ol wokmeri bilong wan wan distrik long painim sampela nupela rot bilong helpim wok bilong ol meri i ken kirap gut insait long Luteran Sios. Na tu ol lida meri bilong distrik i ken autim wanem kain hevi o wari long dispela bung.

Nesenel Komiti i gat pawa long pasim sampela tok long wok bilong ol meri. Dispela ol tok i go long Gut Nius Bot. Ol bai salim i go moa antap long Sios Kaunsil.

Olgeta Luteran meri i bin makim Mis Gabby Gedisa olsem namba wan bilong ol.

WINIM MANI ISI TUMAS

PAINIM NA KISIM OLPELA TAIA I KAM
MIPELA DUNLOP I SAVE BAIM



LAE: Aircorps Rot - klostu long maket

Mipela ORIM AGENCIES i tok
welkam long yu long Rabaul.

Mipela i papa bilong ORIM LODGE
namba wan haus slip tru.

Bet na brekpas bilong yu = K8.50

ORIM'S BAR-B-Q INN

Namba wan ples long Rabaul long
kaikai mit Bar-B-Q. Na mipela i
gat laisens.



Ring: 92.2277; 92.2207
92.2020 - de na nuit

**PREN BILONG YU
INAP OLTAIM**

PNG rais win nau


Mista Pita Hale, man bilong bosim olgeta wok rais long PNG, i bin tokaut olsem: nau rais yumi groim hia long PNG i save winim rais i kam long ol ausait kantri.

Long yia i go pinis ol wokman i bin skul gut tru long pasin bilong putim ol rais long bakstua na holim longtaim, na tu long pasin bilong klinim. Dispela ol i bin mekim long ol rais faktori long Madang na Bainyik long Is Sepik. Na ol rais ol i bin groim dispela yia long Bereina long Papua, ol i salim pinis

olgeta. Ol pipel i laikim tru.

Bipo ol lokal pipel i laikim moa ol rais bilong Australia na i save kolim nem bilong sampela kain rais. Bipo sampela rais bilong PNG i no gat gutpela smel. Na ol meri i no laikim.

Tude yet ol i lukim wan wan retpela rais i stap nanel long waitpela na ol i no laik. Dispela kala i save lus taim ol i kukim rais. Na saveman bilong rais i tok em i wankain tru long pait bilong em olsem waitpela rais.



Poto antap i soim Rosa Memafu bilong Nesenel Laibreri long Port Moresby, we ol i bin kisim 200 buk fri olsem presen long Kristen Pres. Ol buk ya i stori long Papua Niugini, na i kamap long kain kain tok ples na Inglis na Pisin.

Mis Gretel Dabb, het ofisa bilong laibreri, i tok tenkyu na amamas long Kristen Pres, long wanem planti dispela buk yu no ken baim moa.

Na em i laik tok save long olkain koles na skul na dipatmen bilong gavman i save raitim niuspepa na buk bilong ol yet, long salim wanpela kopi i kam long dispela nesenel laibreri. Ol i laikim ol dispela buk i nupela na sampela bilong bipo tu, sapos i gat.

Salim ol tasol i kam long National Library, P.O. Box 3161, Port Moresby.

TOK SAVE I GO LONG OL MARIT LONG PORT MORESBY

Long 20 Epril, long 7 klok apinun, i gat bikpela miting bilong Asosiesen bilong Femili Plening long Hohola Klinik long Bombax Strit long Port Moresby. Bai ol i tilimaut kopi na biskit na paitim planti long wari bilong sampela man i wari bikos i gat tumas bebi i kamap long Papua Niugini.



THE INVESTMENT CORPORATION OF PAPUA NEW GUINEA



Long poto antap yumi ken lukim sampela man bilong Tari long Saten Hailans i sanap holim wirmani ol i bin kisim long Invesmen Koporesen ofis klostu long ol.

BAIM SEA LONG INVESMEN KOPORESEN
BILONG PAPUA NIUGINI

*na bai yu kisim winmani bilong wanpela
bikpela bikpela kampani tru*

Sapos yu laik save moa long we bilong kisim
winmani, yu rait long: Investment Corporation.
P.O. Box 155
Port Moresby.

NEM BILONG YU:

ADRES BILONG YU:

Sapos i gat guria

Guria em i samting i save kamap planti taim long Papua Niugini. . . . moa long hap bilong Niugini olsem long Papua. Olsem em i gutpela yumi tok save long sampela samting yumi ken mekim na mas mekim long taim bilong guria.

Guria i save kamap olsem wanem? Sampela taim bikpela hap bilong graun i bruk aninit long skin bilong graun na i pundaun o surik olsem graun i pairap na i seksek na kalap. Sampela taim mipela i ken pilim guria i laik kamap; tasol planti taim nogat.

OLSEM WANEM YUMI MAS REDI LONG GURIA?

Insait long haus bilong yu, lukaut long ol dispela samting:

1.) Ol srang na loka na bikpela bokis ais i save sanap arere long banis i no ken sanap nating. Nogat. Mobeta yu pasim long waia o rop o baklain samting i go long wanpela nil

long banis bai em i no ken kapsait long taim bilong guria.

2.) Yu no ken lainim nating ol plet o botol o glas o kap samting long wanpela bet arere long banis. Mobeta yu pasim wanpela liklik string o liklik lat bilong holim ol. Sapos guria i kam, bai ol i pundaun na bruk.

3.) Lukaut bai ol glas bilong lukluk na piksa na bilas samting i hangamap long banis i pas gut na i no ken kapsait long taim bilong guria.

Ausait long haus:

1.) Yu no ken wokim haus aninit klostu tumas long bikpela tri, Nogut long taim bilong guria em i pundaun brukim haus.

2.) Lukaut bai ol tang wara i sanap gut na i no antap tumas na longwe long graun antap long bet i gat lek tasol. Tang em inap kapsait wantaim olgeta wara bilong em long taim bilong guria, na kilim

man.

YU MAS MEKIM WANEM SAMTING LONG TAIM BILONG GURIA?

1.) Yu no ken pret. Guria tasol i no inap bagarapim yu sapos samting i no pundaun antap long yu.

2.) Sapos yu stap insait long haus, yu mas hait aninit long bet o tebol o bang samting. Yu ken sanap tu insait long ples bilong dua, o klostu long wanpela strongpela banis insait long haus, tasol longwe long ol windo.

3.) Yu mas klia long stov o bokis ais o bet i gat olkain sospen o buk na glas long en.

4.) Yu no ran nabaut insait long haus. Mobeta yu no traim ran i go ausait.

5.) Sapos yu stap ausait, yu klia long olgeta haus na tri samting. Sanap long ples klia. Lukaut i no gat sampela lektrik waia i hangamap klostu long yu.

6.) Long taim bilong guria yu no ken laitim lam o

stov o laitim kandel. Yu no ken slekim masis; nogut tang gas i bruk na gas i lik na i flai nabaut. Paia bai mekim em i pairap olsem bom tru.

7.) Sapos yu draiv long ka na guria i kamap, stapim ka. Tasol mobeta yu sindaun i stap long ka. Em i gutpela ples bilong hait.

BIHAIN LONG GURIA YU MEKIM WANEM?

1.) Lukaut wanpela paia i no bin lait long haus.

2.) Sapos yu gat lektrik pawa, lukaut bai sampela waia i no bruk. Lukaut bai ausait tu i no gat sampela waia i bin pundaun long pos bilong em, long wanem pawa insait long em inap long kilim man indai.

3.) Sapos yu stap long taun na graun i bruk nabaut long taim bilong guria, em i isi tumas long paip wara o paip lektrik o paip telipon i bruk.

4.) Pasim wara o lektrik

long bikpela tep o swis bilong em.


5.) Pasim ol hul i kamap long tang wara.

6.) Tromoim daun ol samting i hangamap nating, olsem hap banis, ol windo, hap kapa bilong rup, ol rigel o pos o sut bilong haus.

7.) Sapos yu gat telipon, yu no ken kirap toktok nating wantaim ol narapela man. Larim telipon i fri long ringim plis o embulens o dokta samting.

8.) Sanap longwe long ol bikpela haus i bruk bruk, na sanap longwe long hip graun i bin surik i kam daun long maunten.

9.) Sapos yu stap long nambis, yu no ken go wokabaut antap long ol rip. Yu ranawe i go longwe long nambis na antap long wanpela liklik maunten long ples antap. Long wanem, bihain long guria planti taim wanpela bikpela si tru i save kirap na ran i kam sua na bagarapim tru olgeta haus



Strong Tru.

HUSKY DYNA

**Niupela trak bilong Toyota i save wok hat tru.
Yu laik karim kago o pasindia – long biktaun
o rot nogut long bus – dispela trak em inap.**

TOYOTA

BRANCHES
AT:

PORT MORESBY
25 4088

LAE
42 2322

MT. HAGEN
52 1888

ELA MOTORS LIMITED

MADANG
82 2188

RABAU
92 1988

KIETA
95 6083

WEWAK
86 2255

GSP ET 013P

GURIA

Ol poto long dispela pes i soim sampela kain samting i save kamap long taim bilong guria. Poto bilong haus bilong ples i bagarap i kamap long nambis klostu long Madang, we bikpela guria i bin bagarapim planti viles na maunten long yia 1972. Kain haus olsem i ken paia isi tumas long taim bilong guria. Haus i gat rup kapa na banis simen i bringim arapela wari long taim bilong guria. Kapa i ken pundaun katim planti man.

Poto daunbilo i soim rot long hap bilong Madang tu. Guria i ken hatim baret olsem long ol ples balus tu. Na long dispela taim, smok i gat smel nogut i bin kamap long ol ples we graun i bruk.

Poto long raithan daunbilo i soim olsem wanem hap maunten i ken bruk long taim bilong guria na surik i pundaun karamapim olgeta samting. Dispela poto em i bilong ples Tifalmin long Wes Sepik, we haus bilong sampela misineri bin karamap olgeta na-ol i dai pinis. Em long sampela yia bipo.

Ol poto i kam long Pater J. Jurczyk, S.V.D.



TULTUL TITAN

TITAN NOKIM cal.
12 1/2 gauge Staironal Barb
Wire
16 gauge H.T. Heavy
Gral. Barbed wire

Ol pipol bilong mi ol i amamas long lukim strongpela 2 1/2 GAUGE STENDAD GALVANES BAB WAIA bilong TITAN. Olgeta ol i putim aiglas na ol glasim gut dispela TITAN BAB WAIA.

Titan (NG) Pty Ltd. P.O. Box 25 Lae Ph 423988, 423497

RASIA NA SAINA KAMAP

Mista Ebia Olewale, Minista bilong bosim ol wok wantaim ol ausait kantri (Foren Afeas), i bin tok save olsem: gavman bilong PNG i bin singautim Rasia na Saina na Jemani na Frans long kirapim ofis tru bilong ol long Port Moresby na makim wanpela man long pasim olgeta bisnis namel long PNG na dispela wan wan kantri.

Na long hap bilong em, PNG nau i sanapim bikpela ofis moa long London na Fiji na kantri Beljium long Yurop. Nau Mista Fred Reiher em i hai komisina long Englan. Long biktaun bilong kantri Beljium, em Brussels, ol i laik sanapim wanpela bikpela ofis moa long wanem dispela taun i hetkota bilong bikpela asosiesen bilong olgeta kantri bilong Yurop long wok bisnis. Nau dispela ofis i stap long han bilong Mista Peter Donigi.

Sampela man i kirap nogut long harim PNG i singautim nau ol Rasia na ol Saina i kam insait, long wanem tupela i komunis kantri. Tasol Mista Olewale i bekim tok olsem: "Olgeta taim mi go lukluk raun long Rasia na Saina mi save lukim planti developmen ol i bin mekim long ol smolpela, masin samting; ol i mekim long we mipela yet i ken bihainim.

"Na tu long kantri Tanzania na Zambia long Afrika ol Saina i bin wokim wanpela bikpela relwe long gutpela pasin tru. Ol i bin wok gut wantaim ol pipel, na bihain relwe i pinis, ol i kirap i go."

Mista Olewale i tok moa olsem: "Bikos mipela i kisim helpim bilong dispela tupela kantri, em i no min mipela i mas bihainim ol tingting bilong ol. Na mipela i smolpela kantri tu, mipela i no inap senisim ol."

NOT SOLOMONS NIUS

(i kam long pes 5)

yangpela Katolik meri i gat lo olsem: save stap long taun.

Senis i wok long kamap kwiktait tumas long mipela na mipela i no redi long em. Ol yangpela meri tude i wok long lusim ples bilong ol we i gat gutpela lukaut i save stap. Dispela lukaut i no i stap long taun. Diswe planti i painim bagarap long taun.

We bilong helpim ol dispela yangpela i olsem:

1. Daiosis Senet i laik bai ol haus bilong ol yangpela meri i no marit yet i mas gat sampela man o meri bilong lukautim.
2. Dispela haus ol meri i save stap long en i mas i

- gat lo olsem:
1. wanem taim ol i mas kam insait long em long nait;
 2. husat i ken kam insait long haus na husat i nogat;
 3. mekim save long husat i no laik bihainim... salim i go bek long ples.

Em tasol. Tenkyu.
Bisop Gregory Singkai

Bot bilong bosim ol wok kopi bai gat kibung long Maun Hagen Bot long Fonde, 13 Epril. Long dispela taim ol memba bilong bot bai raun na lukim kain kopi faktori na kopi fam long ai bilong ol yet, bai ol i ken save gut long ol wari bilong ol pipel i wok kopi.

PNG



Sapos yupela
laik kirapim
bisnis bilong
prinim pepa
kam lukim
mipela long
PNG Printing
na bai mipela
halivim
yupela

stori tumbuna

Long bipo tru taim ol waitman i no kam yet long Papua Niugini, Wanpela man, nem bilong em MAGRUAI, em i bin i kam long olgeta hap bilong PNG. Na em save harim tok ples bilong olgeta hap bilong Papua Niugini. Em i save raun i go long Chimbu, em i save helpim ol long pait na helpim olgeta samting.

Tasol em save paul insait long ol na i go long Mt. Hagen. Magruai save kaikai olgeta samting bilong bus. Na tu wokabaut i go olsem long Daru long las Papua na go olgeta long ples bilong waitman. Na ol waitman ol i bin kilim dispela man Magruai.

Olsem na yumi Papua Niugini yumi lus tru. Na ol waitman i bin kilim Magruai na ol i kisim pawa na ol Papua Niugini nogat. Olsem na nau ol planti waitman i kam long Papua Niugini na givim eksempe! na givim save long ol man manmeri.

Sapos ol Papua Niugini i kilim dispela Magruai, bai yumi inap long kisim pawa na go long hap bilong ples bilong ol waitman tu.

Em tasol.

Joseph Dua Jerry
Bendam Gembogi
Chimbu Province



MARASIN KILIM 6-PELA KAU

Mista Stephen Tago, Minista bilong bosim ol bus na samting insait long en, i kalap nogut long harim wanpela marasin ol i bin tromoim daun long balus long kilim ol binatang bilong ti na kopi i bin kilim 6-pela bulmakau long stesin bilong Kristen Lida Trening Senta long Banz long Westen Hailans. Na i luk olsem wanpela man tu i bin kisim sik long dispela marasin.

Long planti arapela kantri ol i gat lo long bosim wanem kain marasin ol fama i ken yusim bilong kilim kain kain binatang. Long wanem, planti marasin olsem inap long kilim indai pipel tu. Mista Tago i tok, nau yumi PNG i laik wokim sampela lo tambu olsem.

HELT WOK MOA LONG BUS

Mista Wiwa Korowi, Minista bilong Helt, i bin tok olsem: "Dipatmen bilong mi long yia i go pinis i bin yusim K11 milion long ol provinsal haus sik, na aninit long K5 milion long ol rural helt senta long ol ples na bus na viles.

Em i promis bai nau ol i mas yusim moa mani long helpim ol helt senta, na wok bilong trenim ol et pos odeli bai ol inap stretim sik bilong planti sikman na ol i no mas go long ol bikpela haus sik. Em tu i laik ol pipel i ken skul long pasin bilong kukim gutpela sik i no ken daunim ol hariap.



ROOK'S RADIO olkain gita, spika

P.O. Box 191, Lae. Phone: 42.4616

AIR NIUGINI

THE NATIONAL AIRLINE OF PAPUA NEW GUINEA



NUPELA

SMOKBALUS

RESIS TRU LONG

BRINGIM YU LONG PLES

Poto i soim Pater John Tschauder, S.V.D., wanpela tisa bilong semineri long Bomana i kisim wanpela spesel meda "Pro Ecclesia et Pontifice" long hetkota bilong Katolik Sios long biktaun Rom long kantri Italy long Yurop.

Pater Tschauder i bin kisim dispela medal olsem tenkyu long wok misin em i bin mekim long PNG inap long klostu 40 yia. Long las 15 yia em i tis long Bomana semineri. Bipo em i stap long Manam Ailan long Madang Provins.



Taim Pater i kisim dispela medal, em i tokim ol olsem: "Mi no kisim long mi tasol. Nogat. Mi kisim long nem bilong olgeta misineri i wok long PNG."

Pater Tschauder i bilong Jemani na nau em i liv long ples. Long las 5-pela WANTOK em i bin raitim stori "Hamaija", em i bilong wanpela katekis 'o evanjelis i statim wok long Sepik antap long 1930 yet.



Kirap long lephan long poto yu lukim: Kardinal Agnelo Rossi (bosman bilong olgeta wok misin bilong Katolik Sios), Seketeri bilong em P. Karlo Kasteel, Pater Tschauder, na Pater Henry Heekeren (hetman bilong olgeta SVD misineri).

Maxell i nem yu ken bilipim. Baim em tasol.



YU KEN BAIM LONG OL DISPELA HAGEMAYER STUA

P.O. Box 673, MADANG
PHONE: 822445

P.O. Box 1428, BOROKO
PHONE: 256144

P.O. Box 90, LAE
PHONE: 423200

P.O. Box 63, RABAUL
PHONE: 922633

P.O. Box 11, MT. HAGEN
PHONE: 52 1339



WE STAP OL RIPOTA?

Dia Edita - Mi wanpela man bilong Sepik, mi bin stap longpela taim long Manus. Mi save kisim Wantok Niuspepa olgeta taim long stua bilong Edgell na Whitely, mi save ritim ol pas i kam long ol pipel na ol narapela nius long kantri bilong yumi P.N.G.

O yes, ol wokman na meri long Wantok Niuspepa long Port Moresby, olsem wanem yupela i no save putim planti nius tumas long ol narapela provins. Yupela save putim liklik poto tasol na yupela i save stori long en. Dispela em i no stret.

Mipela i laik save long ol samting i kamap long wan wan provins long PNG olsem wanem yupela i sot long ol Nius Ripota long putim long wan wan provins?

Insait long Manus, mipela i gat wanpela nius ripota em Bob Augui. Dispela man em i mekim gutpela wok na em i putim pinis sampela nius insait long Wantok, nius ol i kolim "Sunam Kona".

Plis tru ol wokmanmeri bilong Wantok Nius yupela i ken bekim pas bilong mi long stret long Wantok olsem mi ken lukim long spes bilong ol pas i kam long ol pipel. Plis tru ol wokmanmeri bilong Wantok, mi no gat bel pen, mi amamas long wok bilong yupela. Yupela save i go aut tru long ol viles pipel. Yupela save tokaut gut long planti long mipela ol viles pipel i no winim bikpela fom. Sampela long mipela i winim standet 2,3,4, na 5. Sampela i no gat standet, tasol mi save ritim Wantok na mipela i klia tru long ol samting i kamap long PNG. Dispela pos koria em bilong ol masta, misis na ol Papua Niugini manmeri i winim bikpela skul olsem yunivesiti, haiskul.

Tasol yumi ol gras lain i amamas tasol long wok

bilong Wantok. Plis tru ol wokmanmeri bilong Wantok Niuspepa, yupela mas bekim pas.

Gawi, Noki, Manus Ailan.

Dia Mista Noki,

Mipela tu i amamas tru long wok bilong Bob Augui long Manus. Man, em i save salim planti nius tru i kamap. Sori, mipela i no gat ripota inap long em long olgeta wan wan provins, olsem na nius i no save kamap long han bilong mipela. Sapos nius i kamap, mipela inap prinim. Sapos sampela manmeri i laik stap ripota bilong WANTOK long wanpela hap, ol i ken rait i kam long edita. Mipela i bin ting nau wan wan provinsal gayman i gat info-mesen ofisa bilong em, na em i ken salim nius i kam long mipela. Tasol inap nau, ol i no bin stat long mekim olsem.



ENGA SANDE

Dia Edita - Mi stap long Enga Provins inap tu yia na mi lukim pasin bilong Enga Provins i no stret tru long wanpela samting. Sande taim bilong lotu tasol ol i save kilim pik olgeta sande na bikpela kaikai yet na mipela bilong narapela provins i lukim dispela kain pasin bilong long kaikai long sande i no stret tru.

Wanpela samting taim bilong kaikai na wok em yupela i save i stap nating na raun nating. Na taim bilong sande, wokim bikpela kaikai na wanpela man o meri tasol i kam long lotu na i no stret. Mipela bilong narapela provins tasol i kam lukim na

ai bilong ol manmeri i go we? Nogat sande bilong ol. Nau em taim bilong kaikai.

Em dispela pasin i no stret tru long Enga Provins. Mi wanpela man bilong Kainantu provins, mi stap tu yia long Enga Provins na mi lukim dispela pasin.

Tow Pakago, Kainantu.

Salim ol pas i kam long:

**WANTOK
BOX 1982
BOROKO**

ROSARI WIN

Dia Edita - Mi laik bekim pas mi ritim long Wantok Niuspepa. Olsem mi laik autim wanpela tingting bilong mi long larim ol plis bai ol i sutim ol hambak man ol i save paitim ol plis.

As bilong olgeta pasin nogut i kamap long Papua Niugini, long wanem i gat planti dropout i kamap long olgeta yia. Na sapos plis i paitim ol raskal long gan. Ating bai no inap long stopim ol.

Olsem mi gat wanpela tingting olsem kantri bai kamap gut long yumi sapos ol famili ol i sindaun wantaim. As bilong kantri em long gutpela famili.

Olsem kantri i ken go gutpela. Olsem tu bai ol gutpela kristen bai ol i tingting long wanpela strongpela wepon em long Rosari. Dispela samting em i win. Mi bilip long ol kristen i ken holim dispela rosari bilong stopim olgeta kros na pait. Em tasol.

S. BingLing, Kimbe/W.N.B.P.

POSIN NA SANGUMA

Dia Edita - Nau bai mi skruim toktok bilong wantok ya S.S.I.L. Jerry, Bumbu/Lae. Mi tu mi gat wankain tingting olsem wantok ya Jerry. Mi tu mi save lukim long hap bilong mi long Masalakar mi save lukim planti man ol i save kilim manmeri long posin na sanguma.

Olsem na mi laikim memba long wan wan patrol pos o sap provins i mas lukluk long ol dispela olkain bilong posin na sanguma. Na mas kisim ol i go na kalabusim ol i stap indai i no ken larim ol i stap. Em tasol.

Yupela prinim long Wantok Niuspepa na ol i mas ritim na save na i no ken larim ol i stap. Em tasol long liklik toktok bilong mi.

Albert Humblara, Dreikikir/Is Sepik.

Fidelis Manzku, Malala/Madang.

OPIM PAS

Dia Edita - Hia mi gat liklik askim long ol sista bilong Sek Vokesenel Skul long Madang Provins. Tru tumas ol save wok gut tru tasol ol i save rong long wanpela liklik hap lo bilong kristen pasin. Em long taim ol o wanpela meri i kisim wanpela pas, man em bai kisim na ritim pastaim bihaim bai givim long tarangu meri ya.

Olsem na mi ting dispela em i no stret. Sapos yu mekim olsem bai yu gat sin o nogat?

Nau mi laik tok gen, bilong wanem na ol i save ritim ol pas? Yu no save, nogut pren man o suşa o brata bilong em bai i salim sampela tok hait o tok sikret bilong em na yu tu bai yu save long sikret bilong tupela. Sapos yu save, em yu gat sin long em. Savet tu?

Lukim nau mi stap klostu long Malala Haiskul tasol mi no bin harim het tisa bilong skul save opim pas bilong ol manki o ol meri. Nogat tru. I tru het tisa em wanpela sista tasol em i no save mekim dispela pasin.

Mi yet tu mi gat meri bilong mi save i stap long Sek Vokesenel skul. Taim mi rait pas, sista save ritim pastaim bai givim em. Olsem na mi gat wari long dispela.

BAIM WANTOK

Sapos yu laik kisim WANTOK niuspepa i kam long yu stret olgeta wan wan wik bilong dispela yia, yu katim dispela tiket long sisis na salim i kam wantaim K8.00.

NEM BILONG YU:.....

ADRES BILONG YU:.....

Salim sek o mani oda inap long K8.00 wantaim dispela tiket i kam long:

**WANTOK
BOX 1982
BOROKO**

Sapos yu bilong wanpela skul o misin o grup na yu laik kisim moa olsem 10-pela WANTOK wantaim long olgeta wan wan wik, orait yu rait na askim mipela long spesel prais mipela i gat long man i baim planti WANTOK olsem.

TOK HAMBAK

(Namba 21:7-33)

God i bin helpim ol larel planti taim tasol citaim citaim ol i bai nogut na i komplem. Wantaim moa ol i tokast agem leng God, na wantu kem i palap long planti snek nogut.

Helpim mi, nogut mi dai.




Moses, mipela i mekim rong. Askim God long pogivim mipela na tekewe ol dispela snek. Pils, pils...

Bai mi askim God.



Moses i beten na God i tokim em long wokim wanpela snek bras na hangamap long wanpela pos.

Yupela harim tok nau. Saos snek i karkaim yu, lukluk tasol long dispela snek bras, na bai yu orait gen. God i tok olsem.



Moses na ol pipel i kirap i go gen. Dispela taim i no gat wanpela i komplem long Moses i bosim ol. Taim ol i kemap long arere bilong ol Amo, Moses i singautim tupela man

Mi orait. Mi orait. Mi bilip God i helpim mi.

Mi tu.



Yupela go na askim King Sihon, i orait mipela i ken wokabaut namel long kantri bilong em.

Oi man i bilip na i bihainim tok bilong God, ol i orait gen.



Long haus bilong king

O King, bikpela baong mipela, Moses, i askim sapos yu orait long mipela i ken wokabaut namel long kantri bilong yu. Mipela no mekim wannpela trabel...
Nogat. Yupela klia - klia olgeta.



Watpo em i kros?

Mi no save. Mi pret. Nau mipela mekim wenem?



Insait long haus bilong King em

I no longtais, na bikpela emi moa i wokabaut i ken

Wantu wantu i tokim ol man, oi mipela emi olgeta mekim rong bilong ol man



Long haus bilong ol larel, kemap na Josua i haus ripot bilong taimen man

Ating bai ol i taimen kemap mipela: bikpela yumi redi.

Long haus bilong King Sihon i gat long haus bilong ol larel



Taim em i no kemap yet, bai mipela kirapim pait



Tulait na King Sihon i go pait. Tasol ol larel i hait i wet i stap na i pait wantaim em

Oi Amo i lus olgeta. Bihain long pait Josua i go ksim biktaun bilong ol, em Hesbon.

Oi soldia bilong larel i win pinis na i laik go hei moa, tasol Josua i go askim Moses pastaim.

Otem wanem? bai mipela go nau long kantri Basan? Em bikpela kantri i gat bikpela king.

Salim sampela spai i gohet pastaim. Bihain ol i ripot, orait mipela ken redi.



Oi man bilong ples i lukim ol skaut bilong Josua na i ran i go ripot long king bilong ol.

King, mi lukim sampela arapela man i kam spai long gran bilong mipela

Ating em ol larel tasol. Nau tasol ol i bin winim ol Amo. Tasol mipela bai smokim ol tru.



Used by permission of the David C. Cook Foundation. Copyright 1973. David C. Cook Publishing Co. All rights reserved.



↑ (Poto i kam long Australian Information Service, na Bob Peisley i kisim.)

↓ (Poto i kam long Veronika Williams.)

Poto long lephan i soim ol sampela spolsmanmeri i sanup insait long nupela ples pilai long Brisbane. Kirap long lephan yu ken lukim: Haggai Zeriga bilong Port Moreshy, Clay Tomkins bilong Nu Saut Wels, Gima Karo bilong Aiyura Nesenel Haiskul, Peter Taylor bilong Nu Saut Wels, Gus Poiopolo bilong Viktoria, Lou Torso bilong Nu Saut Wels, na Annamason Paulius bilong Port Moreshy.

Poto daunbilo i soim Ragbi Lig Tim bilong PNG i bin pilai long Nu Silan. Kirap long lephan long poto long lain antap na yumi lukim: Duncan Yates, Sikope Iko, Linus Geni, Jack Metta, Bob Greathead, Tara Gau, Paul Tore, Pat Beston.

Lain namel: S. Sapu, Joe Gandei, Garia Kora, Steve Malum, Alan Rero, Dikana Boge, Joe Tomerop, Paul Kombinari.

Daunbilo: Openi Geno, David Pukuntap, Asi Winnie, Kaiva Kako, John Wagambie, Peter Pais, Vai Karava, David Tangoa.

